



REPUBLIKA E SHQIPËRISË
KOMISIONI QENDROR I ZGJEDHJEVE
KOMISIONERI SHTETËROR I ZGJEDHJEVE

Data: 28.02.2025

Nr: 213

Ora: 12:00

VENDIM

PËR

**SHQYRTIMIN ADMINISTRATIV BAZUAR NË DENONCIMIN NR. 18 ID,
DATË 17.02.2025, TË REGJISTRIT TË DENONCIMEVE, TË KOALICIONIT
PËR REFORMA, INTEGRIM DHE INSTITUCIONE TË
KONSOLIDUARA/KRIIK**

Sot më datë 28.02.2025, Komisioneri Shtetëror i Zgjedhjeve, mori në shqyrtim çështjen administrative me:

KËRKUES: Koalicioni për Reforma, Integrim dhe Institucione të Konsoliduara/ KRIIK

SUBJEKT: **Z. Ilir Proda**
Drejtor i Përgjithshëm, Policia e Shtetit

Zj. Risena Xhaja
Drejtor, Agjencia e Administrimit të Pasurive të Sekuestruara dhe
Konfiskuara

OBJEKT: Përdorimi në postimet e aktiviteteve institucionale të disa Institucioneve të varësisë së Ministrisë së Brendshme të sloganeve/hashtag-eve partiakë/elektoralë

BAZA LIGJORE: Neni 91, pikat 1, shkronjat “dh”, “f ” dhe “n”, dhe 2, të ligjit nr. 10019, datë 29.12.2008 “Kodi Zgjedhor i Republikës së Shqipërisë”, të ndryshuar, neni 8, pika 3, të Vendimit nr. 9, datë 09.03.2021, të Komisionit Rregullator

Në përfundim të këtij shqyrtimi,

K O N S T A T O J :

Data: 28.02.2025 Nr: 213

Ora: 12:00



“Për shqyrtimin administrativ bazuar në denoncimin nr. 18 ID, datë 17.02.2025, të regjistrit të denoncimeve, të Koalicionit për Reforma, Integrim dhe institucione të konsoliduara /KRIIK”

Koalicioni për Reforma, Integrim dhe Institucione të Konsoliduara (KRIIK), më datë 17.02.2025, ka paraqitur në Komisionin Qendror të Zgjedhjeve (KQZ) nëpërmjet adresës së postës elektronike e-mail, denoncimin e administruar në regjistrin e denoncimeve me nr. 18 ID.

Në këtë denoncim, KRIIK parashtron sa vijon:

“Përgjatë gjithë periudhës parazgjedhore, në faqet zyrtare në “Facebook” të disa Institucioneve të varësisë së Ministrisë së Brendshme janë duke u përdorur sloganet elektorale të Partisë Socialiste, në formën e hashtag-eve. Këto slogane është vërejtur se i përmban Faqja Zyrtare e Institucioneve të varësisë së Ministrisë së Brendshme si:

- Policia e Shtetit;

- Agjencia e Administrimit të Pasurive të Sekuestruara dhe Konfiskuara.”

Me vendimin nr. 108, datë 18.02.2025, të Komisionerit Shtetëror të Zgjedhjeve (KSHZ), u vendos fillimi i procedurës administrative, për shqyrtimin e këtij denoncimi. Bazuar në këtë vendim, i'u kërkua personave përgjegjës pranë Policisë së Shtetit dhe Agjencisë së Administrimit të Pasurive të Sekuestruara dhe Konfiskuara për raportimin e veprimtarive publike, që të paraqesin prapësimet në lidhje me çështjen objekt hetimi.

KQZ administroi pretendimet e personave përgjegjës për raportimin e veprimtarive publike, nga Policia e Shtetit dhe Agjencia e Administrimit të Pasurive të Sekuestruara dhe Konfiskuara, të dërguara me e-mail në KQZ, të cilët deklaruan si vijon:

Policia e Shtetit deklaroi se:

“Infomojmë se Policia e Shtetit nuk përdor të tillë hashtag. Këto hashtag përdoren në postimet e Ministrit apo në faqen zyrtare të Ministrisë së Brendshme, të cilat rishpërndahen në faqen e Policisë së Shtetit, por gjatë 2 javëve të fundit nuk ka asnjë postim të shpërndarë në Policinë e Shtetit.”

Agjencia e Administrimit të Pasurive të Sekuestruara dhe Konfiskuara deklaroi se:

“Në faqen zyrtare të AAPSK-së, është pasqyruar aktiviteti i Ministrit të Brendshëm, me opsionin "share" dhe është e pamundur të ndërhyhet nga ana jonë në tekstin e shpërndarë nga llogaria zyrtare fcb e Ministrit. AAPSK mori masa të menjëhershme për fshirjen e postit të shpërndarë.”

Më datë 28.02.2025, ora 12:00, u zhvillua seanca dëgjimore, ku u ftuan të gjitha palët në proces për t'u shprehur në lidhje me çështjen objekt shqyrtimi. Në tërësi palët iu qëndruan pretendimeve të paraqitura elektronikisht.

Në vlerësim të pretendimeve të palëve, fakteve dhe provave të administruara në këtë shqyrtim administrativ, çmoj se kërkimi sipas objektit i KRIIK, është i mbështetur në ligj, përkatësisht në nenin 91, pika, 1 të Kodit Zgjedhor, *“Me përjashtim të rasteve të parashikuara me ligj, nuk mund të përdoren ose të vihen në mbështetje të kandidatëve, të partive politike ose të koalicioneve në zgjedhje burime të organeve apo enteve publike në nivel qendror ose vendor, apo çdo lloj enti tjetër ku shteti zotëron kapitale apo kuota ose/dhe emëron shumicën e organit mbikëqyrës apo organit administruar të entit, pavarësisht nga burimi i kapitalit ose pronësia”. Po ky nen parashikon se “burime” quhen asetet e luajtshme dhe të paluajtshme, të parashikuara në nenin 142 të Kodit Civil, si dhe çdo burim njerëzor i institucionit”.*

Vënia në dispozicion e faqeve zyrtare në “facebook” apo çdo mjeti tjetër elektronik (media sociale) të institucioneve publike për publikimin e postimeve apo të ripostimeve të cilat përmbajnë hashtag #, slogane me karakter politik/elektoral në zgjedhje, apo thirrje për mbështetje në zgjedhje nga ana e këtyre institucioneve përbën përdorim të burimeve publike.

Nga hetimi administrativ u provua se postimet, ripostimet dhe pëlqimet janë bërë në faqet zyrtare të rrjetit social “Facebook” të institucioneve subjekt i këtij denoncimi.

Pas verifikimeve të kryera nga ana jonë, u konstatua se postimet, ripostimet dhe pëlqimet, me karakter politik janë fshirë nga rrjetet sociale të institucioneve.

Sa më sipër, vlerësoj se duhet të pushohet hetimi, duke i’u tërhequr vëmendje Drejtuesve të Institucioneve Publike që të tregojnë kujdes të shtuar në publikimin e postimeve apo ripostimeve të ndryshme me përmbajtje politike apo elektorale, duke mos lejuar shpërndarjen dhe ripostimin e veprimtarive politike apo elektorale të Institucioneve të tyre eprore, pasi përbën shkelje të dispozitave ligjore të Kodit Zgjedhor dhe vendimit nr. 9, datë 24.12.2020, të Komisionit Rregullator, të ndryshuar.

PËR KËTO ARSYE:

Bazuar në nenin 19, pika 1, shkronjat “dh”, “f ” dhe “n”, pika 2, nenin 91 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, vendimin nr. 9, datë 9.3.2021, dhe vendimin nr. 9, datë 24.12.2020, të Komisionit Rregullator, të ndryshuar,

V E N D O S:

1. Pushimin e shqyrtimit administrativ të denoncimit nr.18 ID, datë 17.02.2025, të Koalicionit për Reforma, Integrim dhe Institucione të Konsoliduara ndaj:
 - Z. Ilir Proda, Drejtor i Përgjithshëm i Policisë së Shtetit;
 - Zj. Risena Xhaja, Drejtor i Agjencisë së Administrimit të Pasurive të Sekuestruara dhe Konfiskuara.
2. Rezultatet e këtij vendimi i njoftohen palëve nëpërmjet adresës së postës elektronike.
3. Ky vendim hyn në fuqi menjëherë dhe publikohet në faqen zyrtare të internetit të Komisionit Qendror të Zgjedhjeve.
4. Kundër këtij vendimi mund të bëhet ankim në Komisionin e Ankimeve dhe Sanksioneve brenda 3 (tre) ditëve nga shpallja e tij.

Komisioneri Shtetëror i Zgjedhjeve

Ilirjan CELIBASHI

